

## SENTA STORICA DEL ISTITUT MINERAR E MONUMENT AL CANOP

L'attività de le vesine minere de Val Imperina l à rendù famos Agort e l à dat moda de spezialisà part de la so dent col nasse de na scola mirada al percors minerar. La proposta ntel '700 de la Republica de Venezia per la formazion dei gotmon e capominador l à catà n bon taren ntel 1775 ma, vinti ani daspò, la fin de la milenaria storia de la Serenissima co la caiuda per man de Napoleon e la fase drio de la dominazion austriaca del Lombardo-Veneto, l à decretà la suspension de le attività de la scola. Podopo la Liberazion del Veneto, ntel 1867, l é stada meduda en si la Scola Mineraria de Agort con Decret del Minister de l'Industria Quintino Sella. I periti capotecnizi minerar de chesta tant cognossuda istituzion i à cossita portà l gnom de Agort ntei cantier de tut l mondo, e i s'à fat vede fora ondechemai per la preparazion professionala e per esse n bon soramanech nte minere, cave, setor de la rezerca de idrocarbur, opre de endegneria zivila, ecc. Ntel 1962 al percors minerar l é stat metù apede chel chimich e l à sgrandà cossita l'oferta formativa con chela de ghe cecà le domande de personal spezialisà per l'industria de la provinzia de Belun. Dal 2009 l istitut, ades "Istituto di Istruzione Superiore Follador-De Rossi" l à catà nnof sedim do a Tamonich e l à tramudà del tut la so senta che encoi la ciapa inte anca alter percors scolastizi. L istitut l é dedicà a Umberto Follador, n perito minerar agordin deventà famos endana la Prima Guera e mort sul front del Piave ntel 1918. L Monument al Canop l se leva su en banda de la svalivada del ex istitut e l é caraterisà da n pop de dimensioi da om che l rapresenta l doven minador. L'opra la é stada fata fora dal artista Guido Pini e con grandeza inaugurada ai 4 de dezember 1952, en ocasion de la festa de santa Barbara. Da chela olta inavant, da cuia ogni an pea via l tradizional codarol de santa Barbera che l scommenzia daspò la benedizion e la deposizion de na garlanda de orer, a memoria de le vitime sul laor sot tera. Son sotvia: "L cant del minador" del Coro Agordo